

本朝分省人物考

人物考卷之九十三目錄

河南汝寧府二

劉可

雷雯

黃綰

熊榮

王誥

喻時

張景

張守約

劉訓

胡賓

劉繪

曹亨

張祉

劉大實

劉容

尚維持

張四知

陳耀文

張九一

官思恕

趙賢

廖逢節

張庸

何洛文

孟洋

李孟楨

劉鷓

陳璋

劉修已

劉光國

王祖嫡

孫充

劉黃裳

汪治

明孟清

黃杰

補遺

遠志

張奎

汪清

朱冠

附朱堦

本朝京省人物考卷之九十三

河南汝寧府二

劉可

劉可字以中羅山人正德辛巳進士授南京主事歷員外郎中擢鎮江知府鎮江故有織造例呈樣段于府可盡革之往直指按部守以下皆庭謁長跽可預約諸郡守毋跽及見諸郡守復跽可獨挺立直指心忌可然陽浮慕之尋陞九江兵憲歷山西布政所在有治績竟以忤權貴乘大計罷歸雖居官二品環堵蕭然其操履端介如此

雷 雯

雷雯上蔡人舉進士授行人擢戶科給事中霸寇起奉勅紀功奏總兵不法免撫臣甯杲丰采凜然乾清官災應詔陳言十四事指斥乘輿皆人所不敢言者武廟惡其疏直留中不下以疾請告卒于家呂涇野嘗云雷給諫在國國重在野野重孫大壯爲祠部郎著有上蔡縣志

黃 綰

黃綰字公綬息縣人進士授刑部主事正德十四年上將南幸綰同衆伏闕叩諫廷杖三十罰跽門五

日得不死遷本部郎中恤刑江西多所全活日執法  
議獄忤權貴人出守紹興竟被逮紹人感其惠哭聲  
震野醵金錢爲贈縮選受二錢至今清江有二錢太  
守之謠下詔獄卒諸薦紳爲棺殮以歸隆慶元年  
恩詔贈太常寺少卿命有司立祠春秋祀之

熊榮

熊榮字以仁光山人初授行人正德十四年上將  
南幸衆情洶洶榮與郎中陸俸等各疏諫留杖謫國  
子監學錄尋擢御史出按山東平礦賊之亂復按雲  
南協征岑猛功業赫然累官至叅政卒祀鄉賢祠

王誥

王誥字公遇西平人嘉靖癸未進士授行人遷戶部  
員外郎郎中屬大同兵變擇廷臣有文武才者出守  
誥既受命遂單車就道計擒首亂兩人餘悉相機  
撫定邊鎮以安紀功者疏其勞詔廕一子汝寧所  
世襲百戶陞陝西副使整飭薊州尋擢僉都御史巡  
撫甘肅練士馬增城堡爲綢繆計虜一入犯率兵擒  
斬首功百九十餘受白金文綺之賜累遷都察院右  
都御史總督漕運兼撫淮南地方時值倭夷猖獗內  
外戒嚴隨疏請旗牌節制兵馬諸將用命江淮以寧



捷聞 上復賜金幣獎勞倚任方殷忽感疾卒 上  
震悼賜祭葬如禮所著有河西稿淮南奏議東隅集  
等書藏于家

喻時

喻時字中甫號吳臯河南光山人也以嘉靖癸未成  
進士首拜吳江令吳江巖邑戶口財粟甲天下吏緣  
是得乾沒爲姦隱賦賄出入若萑苻然比至則嚴拘  
校具得其狀始爲絜法提衡之秋夏稅以限上毋事  
敲朴應以時至毋待號名鄉小民間有鬪鬪片語立  
決大者笞十餘斥遣之各自輸服諸司下訊牒及它

利害關白鑄一大櫃中手自封發吏亡間不得事也  
卽不敢望得一顰笑以少見指而鄉小民亦不復知  
有吏亦不爲操切假惠文彈壓間右時時有所劾治  
皆取大猾尤者吏及大猾惴惴戴三尺而立然竟任  
亾敗墨吏旣御史行部吳江亦不問吏及大猾以爲  
無事再訊令代我治之矣大江而南四郡一州十五  
邑亾論遠近稱喻青天竟用治行第一徵拜御史前  
是太保王肅敏公廷相見其文而善之意不欲以外  
補時對曰必不我也誰當外者王公竒其言而疑其  
未鍊後乃心服爲御史屬虜欲求貢或謂虜狡給我

且事體大勿許便疏曰毋爾也虜以虛紿我而我遽  
絕之是授彼名也虜以實輸我而我逆拒之是剗彼  
心也夫不爲彼先不爲彼後內固吾守而外探其幾  
此在一才邊吏任耳又條備虜十四事上之咸報聞  
相嚴者初得幸上有墨聲抗疏論列謂其人險而猜  
久之且亂天下業已上卽素服候訊北闕上心動  
于時之言而難去嚴因弗究遂出視鹺政河東屬歲  
旱禱雨旱弗利民而當饒得鹺或強毋禱曰不可利  
國等耳吾不忍以吾職易吾民竟禱之雨立澍應歲  
大稔而鹺額亦不虧相嚴日益貴用事乃移疾歸會

其母李老病卒毀瘠踰禮服除徬徨久之相嚴頗忌  
以中州名士行能高未有以中而部檄強起出按蜀  
亦自勵有風稜污吏望風解印綬去蜀以大治還長  
其道事尋遷應天丞轉太僕俄以右僉都御史督西  
輔六郡日夜拊循其吏民練兵實選將扼險虜騎入  
犯距浮圖峪十里覘我師整而和遠巡引去亡何改  
督操江佐南臺數上疏陳便宜計擒大盜汪然朱良  
弼等進右副都御史督漕運時故嘗爲令屬江南運  
爲四議以請其大指約束長賦者毋私兌留減存料  
銀添給運卒行糧改徵腳直詔可仍著爲令益精勤

於職爬搔垢弊殆盡精羨餘金萬計入之朝時人爲  
謠曰鑿鑿鼓下長淮真若翁青天來俄用言官薦進  
督陝西三邊軍務至則獎率將士出邊鹵首虜百餘  
馬駝牛羊稱是虜吉能賓免台吉入寇合三鎮兵破  
之獲首虜五百餘又以延綏兵搗虜獲百餘級三上  
捷賚白金文綺進食二品俸久之拜兵部右侍郎協  
理戎政應 詔上八事所陳嚴補替禁奸詭定編派  
於兵政尤切虜入寇京城時佐大帥鎮遠侯營於郭  
虜不敢越而南 手詔慰勞賜玉食法酒尋出爲南  
兵部時大司馬病在告而特攝武選軍政進其屬矢

天諭之一時翕然稱明考績至家有嫉之者中以浮  
言候別用歸可三歲所而薦疏騰上名爲南戶部侍  
郎督畱儲業已病矣強起其職條上四事曰明注選  
重部運省解納分水兌 詔次第行之竟以不勝劇  
卒年六十五好爲古文辭源出盤庚周禮追琢精工  
世所謂喻氏學者也

張景

張景字光啓汝陽人嘉靖癸未進士兩宰劇邑俱有  
善政擢監察御史出按陝西疏陳邊務十事並薦涇  
野呂先生于 朝繼按蘇松浙江建天真書院祀陽

明先生仍買田數百畝以給肄業諸士丰采凝重激揚得體至今臺中用爲典刑丁酉巡視京營謝絕請託遂與嚴世蕃相左假年例出爲漢中副使尋罷歸卒祀鄉賢祠所著有泰華集六卷子孟容以鄉薦爲岳州同知致仕端廉恬退稱其家兒云

張守約

張守約字伯操確山人嘉靖丙戌進士授中書舍人歷兵科都給事中請罷鎮守閩人出閱延寧兵馬諸疏卓識宏議中外避之己亥扈從聖駕南巡行在數有論奏搏擊權豪無所迴避遂爲郭勛遭陷歸年

未四十而終終且無後母論識與不識咸痛惜焉

劉訓

劉訓字子伊汝陽人嘉靖壬辰進士授西安推官持廉秉公人不敢干以私以憂歸起補溫州有權貴人子怙勢恣睢從惡少數十輩橫行州里漁色罔利欲奪其友人妻不得乃毒殺友人事發到郡太守莫敢問遂托病推印務于訓訓慨然領受故以好延貴人子于廳杯酒笑談密勸閹人閉門呼訟者至與之對理獄既具卽杖殺貴人子置羣惡少于法一郡快焉權貴人大以爲恨然陽浮慕之屬主爵陞爲戶部主



事訓知其微卽挂冠歸隱于東村日共素心人話桑  
麻事時跨一蹇游壠上角巾布袍翛然物外如此者  
三十年

胡賓

胡賓字汝觀光州人生而穎異髫年已能屬文年十  
三選克儒學弟子負卽有聲領嘉靖辛卯鄉薦錄其  
文以式多士會母疾不欲上春官父強之再不得已  
行會試中式稱疾亟歸母夫人尋愈乙未廷試戊戌  
授行人奉詔大名開封諸處開讀己亥營葬建安  
王庚子拜兵科給事中疏論兵馬國之大事而願令

之作役諸監工官利其逋逃虐使之誅求日急軍政日壞京師馬駘習爲姦利賄通太僕諸局以民所依馬更相販鬻馬以大耗辛丑虜大掠山西廷推大臣有武備者一人往經略之時被推三人各有難色賓草疏率諸同列論其臨事避難不忠狀詔罷譴有差廷中慄慄推重尋議畿輔保障全恃太行而真順懷諸郡枕太行不可無備宜責諸路撫臣豫爲隄防兼勅戶部宿軍餉咸切機務是歲畿內大饑粟踊貴草死者多疏請和糴得發粟十數萬全活甚衆壬寅聞父病卽上疏陳情赴蘄水父捐館財八日哀號幾仆

扶柩以歸襄事如禮甲辰服闋復受兵科給事中時  
有作僞璽僞撰武臣貼黃者事覺詔遣賓治其事因  
檢內外貼黃悉覆其弊端疏請遵舊章注專職置底  
簿定揭毀四事積弊以祛人服其識丙午詔冊封

岷王餽遺一無所受考績轉吏科右給事中時都察  
院副都御史闕貞巡撫僉都御史某欲緣以入賓抗  
章歷指其奸賊不可任 上是其言丁未春考察山

東布政使某時宰庇之尋推撫遼東賓疏詆其罪語  
侵時宰怒抵之罪左遷亳州判官比至亳躬敦儉朴  
帥先僚案暇日與諸生發疑論難稽古考德劾邑聞

而來者雲集講下居歲餘得量移南京太僕寺丞庚戌擢山西僉事會當防秋急詣繁峙激勵將士督修城堡嚴守備壬子冬聞母喪奔歸乙卯起除陝西僉事兵備寧夏兼管糧儲先是糧不宿儲至失時翔貴丙辰大饑軍告急賓爲稍增估直以致之期月致穀十數萬斛賀蘭山東故無城堡虜得恣出沒擾人病耕賓按尋前人基堵嚴督傭功延袤可數百里虜不得馳民狎于野晉本省布政司叅議分守關南駐金州去寧夏之日軍民環泣遮留至不得行金在萬山中居民獷悍百務弛廢至則痛繩以法檢行縣廉得

漢陰白河兩令不法狀按如法諸邑肅然敬憚之民  
有趙打虎者坐征紫陽山賊功不賞怨望調征倭不  
行悉械致其衆宣示威福激以忠義咸願咎自贖因  
各笞四十隨第行功賞趙因感泣奉惟謹盜爲屏息  
境內無事時誨諸生衍衍忘倦宛如判毫時丁巳春  
陞山西副使去金之日士民泣送而諸生中至有羸  
糧追送四五百里外者夏五月取道過家七月遂疾  
卒賓爲人莊重立朝無所附麗在諫垣侃侃正論見  
憚同列闔門視草務在勿欺一日草劾布政某鵠聲  
甚惡至隆廳事竟上之其搏擊不避禍患類若此居

外藩務持憲體引大義不詭隨臺史意旨故臺史不  
甚汲引之然公論著性尤孝友恒以父日不及養而  
母老養不能迎故數任不攜家常憂弟賢多病爲分  
俸置產令自適雅厚族黨時推其餘以相贍與朋友  
交重然諾有信義不能姻葬者率助之好德如飴聞  
善卽拜以故海內多士樂與之交

劉繪

劉繪字子素光州人祖進官太僕寺少卿繪身長七  
尺脩髯豐頰目爛爛如巖下電喜讀左氏與縱橫家  
書擊劒蹴鞠挽六石弓蓋豪士也舉嘉靖辛卯鄉試

第一乙未成進士授行人選戶科給事中 九廟災  
疏陳洪範五行休咎勸 上深居法官靜攝日久夏  
相與郭勛共傾王大司馬罷歸繪疏劾夏十罪夏亦  
罷去轉刑科右給事中出守渝州至渝閱士得銅梁  
張肖甫奇之後竟以文章功業顯會播州永寧爭地  
相攻殺繪單車入赤水上草檄撫定兩臺疏薦爲循  
吏第一而貴溪復相嗾其黨論劾卽日南還製荷衣  
芒屨攜二二三小僮放歌長途曾無幾微見于顏面抵  
家問玄湖蘆植松竹花卉與故老談笑舟中酒酣起  
舞或自度曲飄飄若神仙中人每與楊用修唐應德

諸君詩筒往來無虛日嘗與康德涵何太華會于武功東沂作燕趙之音宮羽轉激風雨驟至輒掀髯長嘯其意不可測也年七十卒所著有通論四十篇詩賦序記禱文二十卷行于世

曹亨

曹亨字伯貞新蔡人都御史曹鳳孫也嘉靖乙未進士授刑部主事亨素諳法家語奸吏無所措手亦未嘗一徇豪貴之請名稱藉甚出守兗州用嚴爲治奏上天下第一會有紅羅女者以妖術惑衆至數萬人集下軌官兵莫敢櫻其鋒亨提兵往勦乘風縱



火以萬弩射其後賊敗走至曹坡集驚曰坡者破也  
公姓當之遂就擒擢荆南副使時遼庶人多不法然  
憚亨不敢大橫遷浙江叅政以外艱歸服闋當起念  
母老且病疏請終養日擇甘毳進母而夜則伺其呼  
吸及卒哀毀踰禮丙寅起原官尋陞副都御史巡撫  
真定適虜犯太原羽檄夜至亨卽貫甲出鎮帥追及  
挽其轡亨曰我雖老猶辨殺賊卽馬革裹屍公能無  
恙乎將吏咸奮懼破虜龍泉關下進兵部侍郎協理  
戎政營伍一新 穆皇大閱賜飛魚服廕一子尋陞  
南京工部尚書舊織造大璫歲冒水衡錢不貲亨奏



警舖樓堞無不畢具屹然金湯之險矣費金錢以十萬計民不知擾適楚相當國有所私囑社抗節不阿遂拂衣歸邑志稱其墨卿藻匠諸體兼工文準歐陽詩宗大曆守郡籌邊似尹晉陽持身約己似婁師德蓋實錄也

劉大實

劉大實字子虛確山人嘉靖戊戌進士授高平令擢吏部主事遷文選郎拔幽滯抑奔兢銓政一清趙文華怙勢欲由銀臺拜少司馬大實薄其爲人卒不以分宜故私之尋遷太僕寺少卿綜覈馬政不遺餘力

奏劾趙愷等置之法諸廢漸起進順天尹戶部右侍郎竟爲忌者所擠罷歸家居二十載不畜姬妾田產所入悉以贍姻族及鄉里之貧者曰吾安忍獨富貴爲也年七十二卒有司以 聞賜祭葬如例子渾成嘉靖乙丑進士歷官工科給事中浙江右布政使有治績

劉容

劉容字汝大汝寧羅山人也生而恬澹無所好成童時動止一以禮授經于叔祖東東發解中州行誼爲里人重而尤負人倫鑒每撫容謂族中人曰是兒他

日不但功業顯當以令德著惜吾不及見耳自是邑人稍稍竒之而容益韜晦嘗慕徐孺子非力不食之義習勞甘苦刻意向學家貧恒教授以養父母父母安之每舉筋歎吾食藜藿不知列鼎之爲美也嘉靖庚子舉於鄉上春官不第從遊日衆青袍草履寒暑不易坦夷不校人望而親之嘗之館塾無賴子醉詈遜謝不已久而方解次日里人共責無賴子非人悔恨至欲自經友愛甚篤二弟宋官授室治生讓先廬與之而別剗茅屋于其側里之闕墻者往往感化時諸邊缺馬大括郡縣不惜重價人競趨之容若不聞

也者令鄧君雅相敬重又憐其貧密以詔之容謝曰  
我無馬鄉人共知今又有馬乎姻黨被誣乞居間容  
諭之曰吾人處世所恃者天道神明而已爾誠誣人  
卽不直神亦直之奈何舍正路而鑽別竇令聞其言  
乃白誣者生平不喜女色友人疑其矯強飲外墅而  
先寘美姬于空室夜分各寢一所謂容好靜宜居此  
鑄戶去而姬出竟危坐待旦天甚寒姬啼以衾與之  
終不一顧友人太息曰坐有魯男子而吾不知何云  
交厚哉遊南雍宿正陽主人婦少而新寡夜就容婉  
轉誘之故作暴疾狀呼僮篝燈煎藥味爽馳去僮爲

人言終不洩也已未父母相繼卒哀毀逾禮令陳君造廬慟諭摘禮不慈不孝之文以示矍然汗下始有起色辛酉禫除矢感風木不赴公車或曰不忍仕是也如夜臺未沾一命何又矍然汗下跨一蹇驢去試復不利謁選判黃州抵家而姜宜人卒泣曰此與我同辛苦事父母者父母不及祿養而宜人亦以荆布從之吾何忍再娶且有牛衣鹿車之誓矣營葬畢單車赴任黃號難治而判專催科逋負至二十餘年務以至誠開諭不事鞭笞爭先輸納他郡糧不完及錢穀焚贖亦以委之立辦監兌蘄州黠吏悍卒相戒斂

戢容布袍蔬食不殊寒士人或風之笑曰惜福礪行  
吾自甘之不知其他也自是廉平之譽孚于上下薦  
剡旌牘莫可殫紀乙丑 景王樞回京中貴人僕從  
橫甚兩臺以下凜凜恐獲譴容力任之中貴人素聞  
其名嚴諭其下無所擾撫臺徐公謂其屬曰吾儕嫉  
閹宦如仇畏之如虎每每激而取禍觀劉君事良愧  
矣居久之擢同知府事監收船料夜泊蘆洲賊拔刀  
突至詢知爲容叩頭謝過仍衛送出境而萑苻之警  
稍靖副推僉臬者數黃人恐其去環訴兩臺竟從民  
情不遽奪也隆慶改元籍沒陶氏適當其事無一波



及守缺例入覲一篋自隨見者垂涕任既久操愈厲而吏事益習漕院檄造運艘數十工竣而洲涸百人推挽屹然不動相視無計乃命通一小渠布以田間淤泥數人曳之利涉如川遂達江潁癸酉擢南戶部員外郎任黃十一年矣士女攀臥號哭之聲震于原野爲立生祠歲時伏臘若水旱疫癘禱亾虛日抵白下未幾權關武林公私稱便久之值滿考堅欲乞歸少司徒汪公曰知君志不可奪顧不爲二尊人地邪又矍然汗下貸十金行時銓曹二人一爲門生一爲舊部僚風以少需當有顯陟容不謝亦不辭而去又

久之擢知滇之廣南貧旣不能行又疾作懇疏乞休  
得允致仕獨居索處一榻蕭然親知勸爲主饋計流  
涕曰老而再娶是曰昏悖卽賢邪且有累如不賢敗  
德破家所不忍道吾卽忘糟糠約可以四十年苦行  
頭陀萌還俗念哉俸入盡散親族至不能舉炊陋室  
湫隘不蔽風雨讀書課子泊如也每出仍布袍草履  
婦人小兒見其來亦斂衽起里有不善惟恐其知絕  
迹公府達官貴人避匿不見式廬造請亦不及公府  
事也壬午大慶覃恩進中憲大夫甲申五月痰疾大  
作猶手一編寘牀頭誠諸子甘貧安命毋爲市井計

六月三日索湯飲訖就枕少憇卒時盛暑顏色不變  
人咸異焉

尚維持

尚維持字國相羅山人嘉靖庚子領鄉薦第一明年  
登進士授廬州推官擢御史巡鹽河東修舉鹽政孚  
于常額仍推其羨全活饑民以萬計繼按蘇松當倭  
寇殘破之後爲畫長策建沿海五城勢若率然永絕  
後患維持故高才能文章按部之暇時以課士遂陞  
陝西副使提督學校懸鑑持衡錙銖無爽秦晉三吳  
豪俊出其門者嘗半天下

張四知

張四知字子畏河南汝陽人也舉嘉靖庚戌進士是歲禮部所籍奏士多海內文學之選號稱極盛而一時諸公聚闕下若維揚宗子相嶺南梁公實吳與徐子與豫章余德甫鄂州吳明卿西蜀張肖父輩竝馳聲騷苑而諸公者更喜驚新調競單詞隻句之雄轉相引重爲名高少年爭附麗之四知日遊諸公間意獨不謂爲然數以口語折諸公兩不肯相下乃四知愈益閉關下帷湛精極思自攻其所好久之出其所爲古文詞類能剗削浮豔直臻雅道纒纒然成一

家言諸公竟不能詘也初郎比部尋調駕部往時傳符闌出于者如蝟一切拒絕卽大司馬有所縱舍爲貴勢人地直持之不毫髮假貸以是貴勢人多銜之居亾何出爲四川按察僉事比至所部壹意修舉憲體故示嚴重五馬大吏來關白事不長跽不起坐而諸所懲汰尤峻賊墨望風憚於神君川東故有禹坊會蜀撫公阿寵臣陸某意檄所司爲其遠祖宣公樹縛楔制覩禹坊特敵斥之曰宣公卽名臣功高神禹耶亟縮之毋玷累宣公爲也或以聞撫公撫公大慚恚欲有所中而四知以母病業上書請急行矣明年

撫公念前恨不已竟劾罷其官既罷官居汝自傷坎  
壘益與世疎一夕忽夢張平子語之曰吾宗之彥在  
子矣寤而歎曰嗟乎天將畀余以窮愁著書耶堅鏞  
其戶戒門不與通賓客日坐一室旁羅圖史惟以著  
述自娛而已汝故南北都會士大夫喜務豪舉每招  
客或徵歌選舞以爲驩一切悉屏弗御自是汝人目  
爲崖異罕與之往來乃自信較若刻畫終不肯少刑  
以徇衆人也所著書有韶亭詩集若干卷雜文若干  
卷中州考若干卷崇古韻證若干卷四書釋義若干  
卷藏于家

陳耀文

陳耀文字晦伯確山人生而穎異日記千言目視數行俱下鄉里號爲神童十二補邑庠生登嘉靖庚戌進士授中書舍人官有餘閒得博極羣書自經史外若丘索竹書山海經元命苞穆天子傳等類以及星曆術數禪官齊諧無不該覽時有撰造或思不屬夜輒夢一叟共相擬議蓋鬼神通之也陞工科給事中感慨時事數上危言忤時相意謫魏縣丞量移淮安推官寧波蘇州同知遷南京戶部郎中淮安兵備副使淮揚多盜其里中豪恣爲奸利往往稱逋逃主耀

文悉擒治之民爲立德政碑尋陞陝西行太僕寺卿  
耀文故倦遊不樂邊塞遂請告歸有指揮饋以造船  
餘金千兩麾而却之抵家杜門日以著述爲事初不  
問家人產卽干旄在門猶高臥不起年八十二卒所  
著有天中記正揚學林正學圃萱蘇經典稽疑花草  
粹編諸書行於世

張九一

張九一字助甫新蔡人嘉靖癸丑進士授黃梅令以  
治最擢吏部驗封司主事是時李于鱗王元美吳明  
卿諸君方結社談藝九一遊處其間睥睨一世會元



美父中丞公失分宜相繼構下詔獄九一數過存問  
坐是出爲南尚寶卿再調廣平丞尋遷湖廣僉事駐  
節岳陽 景王歸葬所過巨璫要挾以千萬計九一  
給曰第行後當自辦延至斬黃將出境維舟以待九  
一故令數百人舉火遠譟璫駭懼以爲盜也夜解纜  
去遷布政司叅議以憂歸于洪河之濱構綠波樓積  
書萬卷諷誦其中凡十年起補涼州陞副使兵備甘  
州適虜王西牧駐兵青海謀且叵測乃用奇計制虜  
使北歸視陳戶牖解白登圍如出一轍以功歷都察  
院右僉都御史巡撫寧夏寧夏孤懸河外與虜爲隣

軍中數驚乃斬賀蘭山赤木口諸隘修典武營清水  
堡諸壘擊刁斗自衛虜不敢犯數受白金文綺之賚  
會言者治江陵事註誤坐調歸歸而開大呂社與羣  
少談詩或呼朋嘯侶泛舟南塘雄飲豪吟軒軒霞舉  
蓋吞雲夢者八九王元美以爲吾黨有三甫公其一  
也卒年六十有六 上遣藩臣諭祭所著有綠波樓  
集朔方奏議若干卷子體震領萬曆戊子鄉薦能以  
文學世其家

官思恕

官思恕字子仁光山人嘉靖乙卯舉于鄉喜任俠走

馬燕山有封狼居胥意歸而母彭沒思怨哀毀幾絕  
結廬墓旁有白鳥冬笋之祥居廬百家之言無不涉  
獵而尤喜讀易因而有悟遂絕意仕進南之楚與天  
臺耿先生兄弟焦弱侯楊道南游數年還居天中山  
房默坐研思至忘寢食一日遺友人書曰始吾從羣  
書入茫乎莫得今從靜中討出端倪方信此心原與  
天地萬物無兩道其在茲乎士人熙然宗之所居白  
沙關山連兩省民俗頑梗乃結社其間講明正學發  
揮高皇帝聖諭六言聽者如堵亾何有四十八人  
者鷄冠佩刀請見曰某等柴山盜魁也習聞先生之

祇願自洗濯以歸聖化奈鼎鑊何言畢環拜而泣童  
僕皆走避思恕從容謂曰律自首者免爾果洗心來  
有乎無遺後悔歸試思之詰朝詣社如是者三乃以  
聞之邑邑聞之郡太守史公桂芳異其事召四十八  
人者至如向語太守請于中丞御史待以不死蓋隆  
慶已巳間事也明年兩臺疏薦思恕孝友 詔下徵  
用會病卒

趙賢

趙賢字良弼汝陽人嘉靖丙辰進士授戶部郎庚申  
臨清辛酉遼東兩差皆司錢穀風清弊絕可泣鬼神

壬戌擢順德守未任丁內艱歸乙丑起補荊州荆道  
有大浸賢席不暇煖身行村落間計口賑饑操舟渡  
溺閔閔焉若慈母之於子也仍爲築隄障水流渠灌  
田於是荆人始無水患而且享水利大盜楊勝德黃  
中輩流劫地方賢單車詣壘責勝德以大義賊衆皆  
叩首伏黃中等亦聞風降各待之不死地方以寧會  
遼庶人以罪廢武岡王署其府事謀危二孤賢械其  
黨惡教人抵干法叅武岡王而易之兩臺及張給諫  
鹵皆疏薦治行第一丙寅加三品服俸戊辰陞湖廣  
叅政仍守荊州荊州士民不啻家尸而戶祝之亾何

丁外艱歸壬申起補湖廣叅政四月陞浙江按察使  
七月陞僉都御史巡撫湖廣下車卽畫楚便宜條上  
十事復疏救荒四事一一措諸實政暇則褰帷行部  
問民疾苦顯揚節行益三年而楚國大治乙亥 召  
回協理院事歷副都御史巡撫山東吏部侍郎南京  
吏部尚書鴻猷亮節所在著稱時江陵方秉國最稱  
知已然以公非以私也守荆撫楚嘗以三尺繩其親  
識僕從無少貸及其奪情罪言者又移書規諫而江  
陵不聽遂以形迹自遠乃卒爲所波及海內惜之後  
子壽祖爲安慶守考績上章白狀 詔復原官准致

仕萬曆丙午卒年七十有三公生平孝友厚德高義  
輿論重之

廖逢節

廖逢節字應時固始人嘉靖丙辰進士授戶部主事  
癸亥陞郎中督儲永平悉除舊弊另創新規足國  
裕民聲猷大振遂守永平丙寅陞朔州副使以病請  
告歸已巳有虜警起補口北道內修外攘邊人倚爲  
長城不聽遷去乃加叅政職銜仍管口北道事庚午  
陞都察院右僉都御史巡撫甘肅甘肅卽漢酒泉張  
掖地孤懸絕塞以番爲蔽然虜數掠番我不能庇番

因與虜合且爲之鄉導逢節撫番禦虜恩威互施開  
闢五年邊人安堵嘗受白金文綺之賜乙亥改南京  
太僕寺少卿是歲十二月聞憂歸屢薦不起晚節好  
佛遂爲有髮頭陀築精舍于城外鐵佛寺與僧明玄  
等結社談禪恍若有悟丙戌歲忽無疾而終

張庸

張庸字子登光山人嘉靖己未進士授揚州推官坦  
夷而介有定遠令致餼匿金於甬庸曰余性不喜飲  
可將去然竟不以是語人也擢刑部主事恤讞江西  
多所平反得疑獄百八十八人疏請矜釋大豪吳姓者



欲以賄脫介千金抵其里趙趙未投已聞其生平行  
誼遂夜遁去里人爲之語曰定遠懷金令江干抱壁  
囚一時廉平之聲播于中外歷本部郎中丁丑陞延  
安兵備副使開虜變單騎之任練兵脩守虜遂退上  
章乞歸自是閉門養寂凡公私宴會俱不赴每言及  
壬申之難輒涕泣不能已竟以是感疾卒

### 何洛文

何洛文字啓圖信陽人淵源家學少著英稱領嘉靖  
辛酉鄉薦第一乙丑成進士改庶吉士每試館閣輒  
冠曹耦已巳授編脩壬申 神宗出閣講學洛實躬

奉之 賜宴文華殿錫之金綺尋緣 上登極恩擢

脩撰克 經筵 日講官數受白金文綺之賜歷中

允諭德侍讀學士掌院事詹事府少詹事禮部右侍郎尋陞左凡在詞垣者七任而周旋講幃者十年每入講必先齋沐期以精誠悟主芻引曲喻用規時政及罷講 上未嘗不稱善嘗大書責難陳善四字賜之與脩 兩朝實錄起居注太明會典累效編摩辛巳以省親歸會江陵事起爲言者所波及 詔予休致丙申居 喪庚子卒計 聞賜卹典特厚仍廕一子入冑監公天性孝友好行其德慕義急難無所恡

惜家居垂二十年嘗與汝陽趙太宰良弼新蔡張中丞助甫諸君爲山水游角巾野服觴奕詩篇不減香山洛社矣所著賦頌詩文二十卷

孟洋

孟洋字望之其先金山人徙居信陽年二十三舉進士爲行人時洋之內弟何仲默方有俊名與其羣李獻吉王子衡崔子鍾田勤甫及洋日切劘爲文章揚摧風雅以相振發酒觴會聚婆娑酣嬉以相樂時稱十才子也而洋選爲御史卽疏論當道大臣張聰桂萼用是下詔獄謫桂林郡學教授天下又皆高洋之

節而諸子者亦各以氣節自著不獨稱才也洋由桂林遷汶上知縣嘉興府同知擢湖廣按察司僉事持憲專決恥唯唯恭遜意小拂卽日拏舟徑歸引疾致仕久之起山東僉事歷陞陝西叅政拜都察院右僉都御史巡撫寧夏尋改督儲聞母疾劇卽解印馳歸或以職守難之曰吾安能顧此耶會改洋總理河道命卞值郊恩賜封躬捧冠帔至家踰四旬母乃殂詩論謂孝感云服闋拜南京大理卿衆謂駿駸柄用矣到官甫五十日遘疾卒有有涯集行于世

李孟禎

李孟禎字子吉汝陽人少補邑庠卽有先民矩度事親最孝對妻子如嚴賓戲謔不出諸口喜怒不形于色視聲色貨利箴如也嘉靖間以里選爲濟陽司訓謝絕餽遺揭周程張朱諸格言于壁間化誨諸士偕之大道諸士駸駸向之有過不敢使知俄解官歸家徒四壁立怡然安之生平善太書人得一紙不啻拱璧然頗自重不欲應豪貴人求西平王司馬走幣數千里靳書坊額而行人失辭遂麾諸門外先後郡太守若王公崇古徐公中行皆雅重其爲人數加請召或枉車騎過之而禎絕口不談時事未幾卒

劉鵬

劉鵬確山人始劉政以孝行受旌而鵬其從孫也幼有至性操行甚高事父母極備色養與兩弟同居怡怡如也母病衣不解帶焚香籲禱母方在昏夢中恍有告者曰汝子孝子汝病至某日而愈後果然六年有流寇之變鵬負病母攜弟侍父走避山谷間跋涉險阻手足清裂賊入城大肆焚劫至鵬家見一老嫗問主人何在嫗以孝子負母入山封又睹其門有孝子劉政坊乃叱其徒曰此世孝子家也勿犯故其舍歸然獨存後父母繼歿鵬哀毀骨立目幾喪明葬祭

悉如家禮終身孺慕化及鄉鄰萬曆丁丑卒邑令東  
棐率諸僚屬躬往吊送士庶雲集相與泣下事聞受  
旌表其子家傳家齊俱能世其孝友焉

陳璋

陳璋字公獻河南光州人也七歲舉奇童郡太守鄧  
公令賦卿雲立就數千言稍長工詞賦精右軍書性  
貞介視身脩潔以孝友聞弱冠登高第守景州五年  
冰蘖如一日清徭役革積弊者三百餘戶理馬甲虛  
冒累及子孫者安撫青兗礦徒二千餘令自解散九  
河水患由阜城築堤至德州迄今平成頌陳堤父老

立祠血食陞太平府同知遷松江府倭寇作舉經略  
才欽委協同蘇州府同知任環操練籌畫上禦倭十  
二事切中機務自統兵敗倭斬首千餘級餘寇浮海  
東遯重蒙 欽賞朝議叙功當顯陟緣不阿相臣轉  
司寇即日坐署中操觚染翰以纂述自見李于鱗王  
元美徐子與無不推許者性不樂仕進歸臥星湖杜  
門著書四十年闐闐罕覩其面足不履公庭有司屢  
請乃一入飲立義學義田教養宗族其鄉里親戚貧  
乏者每加周給郡人士有污行恐陳公知文行踴躍  
咸稱陳太丘云年七十應本州聘著誌書十六卷文



辭高古有良史風又星湖漫稿四十卷葆光堂別集三十卷陳氏世範二十卷太平事略四卷行于世

劉脩已

劉脩已字以敬汝寧新蔡人也舉丁未進士爲吉安府推官爲人簡素伉直於辭貌無所修設每羣會遠遜俯揖若不甚解事者當道厭其所爲將予殿課郡守靳君學顏力抹乃免間謂君曰忠信篤敬四字吾平生學而未能汝第勉之無憂齟齬也旣感激受教而郡故健訟明習法令日夕手撰獄辭不他寄耳目當道且多其才督委檢括往來郡邑無虛日俾署吉

水吉水素號繁衝每受賦役率因俗便安不盡更異  
豪右怙拒者道令諭意必聽乃已無何朝廷以邊  
劇遣使索逋旁邑牒猝辦民多瘐死乃名掌賦者期  
日入賦民相謂曰公素庇我我不可負公未旬日畢  
如期無一人受鞭笞者每聽訟據案默坐徐折以片  
言或摘單詞相詰莫不愧服情既白令休外舍月餘  
不名久之多悔悟去不復追逮其敦教化如此爲推  
官三年強半居吉水其在郡一言無所假借至爲吉  
水卽三尺童子可以牽衣告語亦時時降色撫慰之  
故吉水之民率視其來去爲喜愠聞新令且至莫不

感額時感疾留郡輒疑其避事無何卒人人頓足禱涕卽深山婦孺亦歎息嗟駭比卒家無遺金知府陶君大年爲棺衾以殮經紀其喪乃得歸

劉光國

劉光國字黽勳上蔡人幼孤貧母王孺人以績紡資遣就學登隆慶戊辰進士授太原推官渾厚精明能斷大獄有盜入人家劫財殺主三年不獲巡臺以屬光國乃悉呼其比隣至潛察一人色動大聲曰殺人者汝也奈何以累多人一訊而伏血衣兇器具得衆駭顧以爲神癸酉徵拜監察御史因旱陳言欲停梵

宇不急之工 上怒責令回話賴賈都諫疏救猶奪俸一年乙亥出按陝西庚辰出按順天所至發奸宄懲貪墨風采凜然癸未以內艱歸免喪拜順天丞俄改陝西副使會奢酋西犯河湟 天子遣大臣經略督府詢謀可當大事者是冬擢叅政駐金城壬辰擢按察使駐湟中皆深入絕塞治兵飭備拮据萬端虜遂款關無何有唃廝囉之變官兵攻圍年餘不下餽餉告急光國自臯蘭城下筏經行虜地芻糧軍器絡繹不絕擢僉都御史巡撫陝西凡賚金幣者二陞俸者一嘗自言曰世以含宏爲雅量而我任法世以圓融

爲善仕而我好執寧無戾乎竟以是中忌者萬曆甲午罷歸乙巳卒

### 王祖嫡

王祖嫡字胤昌父詔爲信陽衛指揮僉事負氣自喜不肯屈下文吏用他詿誤具獄奪世爵祖嫡幼警敏殊常見稍長日誦數千言卽能詩二十八舉于鄉乃走闕下上書白父寃竟得昭雪復其爵隆慶辛未舉進士改庶吉士癸酉授檢討明年春 詔冊封 韓藩登太華絕頂得詩賦若干首皆驚人語壬午以內艱歸廬居墓側服闕起補原官俄遷國子司業上疏

言革除間事請及時釐正得 旨許重錄 景皇帝  
事而 建文君事姑止明年遷司經局洗馬兼翰林  
院脩撰纂脩 玉牒扈從 上閱壽宮賜四品大紅  
羅衣一襲嘗探明因寺碑中有塗膏釁血語微以示  
諷偶達 慈寧宮賜以寶鏹文綺佛像藥物及諸珍  
饌尤詞林盛事也尋擢右春坊右庶子兼翰林院侍  
讀以妻喪遂請告歸祖嫡孝友天植終身色養無違  
詩文博雅瑰麗卓然名家晚逃于比屬續神氣脩  
然不異平日著述種種未及成集而卒

孫 充

孫充字應文固始人萬曆甲戌進士授翼城知縣以  
憂歸癸未起補涑水治聲爲三輔最乙酉擢湖廣道  
御史在臺獨持大體不激不隨丙戌出按畿南廉得  
巨猾十數皆根據衙門依倚城社者捕而置之法其  
小者勿問也激濁揚清威稜大著有邑令貪而善宦  
預結權貴人爲之地充怒劾罷之談者謂爲真御史  
丁亥復命十二月差按淮揚次年二月竟以抗直  
出爲山東僉事卒于官充立朝居鄉挺挺節操初不  
問家人產里居但有茅屋數間亾他長物其澹泊寧  
靜有如此

劉黃裳

劉黃裳字玄子重慶守繪之子也七歲操觚摹逸少書十歲寓長安賦京都諸篇奕奕動人乙卯魁兩河士明年上春官不第傲然不屑思欲一當千古發憤爲詩文著述日富王元美紀于鱗後三十子其一也乃黃裳故習天官家言語諸邊形勢機略沉雄欲有所用之復起應試登萬曆丙戌進士授刑部主事遷兵部員外郎會倭犯朝鮮遼左大震上特賜黃裳四品服俸贖晝宋司馬經略河防并援屬國遂度山海關趨平壤進擊城下倭敗走黃裳率衆追逐直貫



賊陣引大黃射金甲酋倭兵死者過半逾金山島而去事定幕府上其功遷郎中賚以白金文綺擢邊道副使遇缺推用黃裳以久勞異域請告歸野服徜徉不復道海上事日賦詩弄琴游意翰墨偶飲其徒文學家揮洒至丙夜天寒甚不懌而返卒所著有元符圖藏徵館海上編東征雜記諸書行于世

汪治

汪治字子順光州人。生而敦穎，孝友篤學，登萬曆己丑進士，除大理寺左評事，勘詳疑獄，數有平反。甲午典試西粵，所識拔多知名士。乙未陞南京祠部郎。戊

戍擢保定知府務與民休息不苛察以立威會歲饑  
檄所部煮粥給粟而身自單車督視所存活百餘萬  
其招撫復業者又數萬人保民以蘇有孝廉某爲中  
貴人誣構訟之京治請得自理竟置中貴人于法復  
調停礦稅減歲額若干金卽權璫耽耽勿恤也辛丑  
畿輔旱而保定爲甚饑斃嗷嗷是用疚心爲禱于神  
奔走營救不遺餘力至捐俸二百金佐之坐是焦勞  
成疾遂不起父老子弟皆罷市爲立祠祀焉光州亦  
祀於鄉賢子若霖壬辰進士禮科左給事中

胡孟清

胡孟清字汝揚光山人壺關令錠之子十二歲補邑庠生溫然如玉父母絕憐愛之而清亦善承親意曲盡子情萬曆丙子舉于鄉母陳孺人病清旦暮侍側衣不解帶及卒水漿不入口者七日己丑成進士宰長治補任丘所至有治聲擢戶部主事權稅九江取道過家拜其父東臯公於堂下依依戀慕如爲赤子時閱數月迫于簡書始涕泣別去旣抵九江事欲便民適初設小池口稅厥權璫爲政清力諍不允感憤成疴遂不起

黃杰

黃杰字式彥息縣人三歲而孤穎悟異常兒伯父  
御公家棟愛之誨以儒術遂登萬曆己丑進士高等  
授武選司主事奉命賑恤邊陲殫力區畫事竣過  
家以板輿奉母楊安人北上就養京邸曲致其懽尋  
擢庫部員外郎楊安人忽感疾杰躬侍湯藥至廢寢  
食籲天求以身代母竟不起杰扶櫬南歸哭不絕聲  
抵里之日僅存皮骨遂以此成疾終年三十有八楊  
安人已奉詔旌表節孝總萃于一門

補遺

遠志

遠志河南遂平縣人洪武五年由兵部司務陞陝西道御史陞大理寺丞尋陞僉都建言被謫陞戶部主事員外調永州府同知陞應天府丞致仕

張奎

張奎字文星河南商城縣人正統十三年進士由東光知縣選浙江道御史清軍北直隸建言下獄謫蕪湖知縣卒

汪清

汪清字湛一河南固始縣人景泰二年進士由豐城知縣選浙江道御史巡按淮揚建言降涿州判官旋

陞順天府丞疏請致仕

朱冠

附朱堦

朱冠字仲瞻河南固始縣人正德三年進士除廣西道御史巡鹽兩淮流賊陷固始縣父母合族皆被害聞變慟絕回籍不仕嘉靖元年起江西僉事不就初時橫被流賊之害族丁俱絕冠獨與舊役吏居苦勸之再娶始從之因以有後居鄉多行善事朱氏仍冒大朱堦舉甲辰進士令臨晉有循聲行取湖廣道巡漕按浙所至動著風裁又每事務從簡靜議論獨特大體卽其孫也斯亦世德之報矣